

Tambe cu critica riba minister Bermudez

Topa no ta di acuerdo cu protocol di Dialogo Social pa cu AZV

ORANJESTAD — Sindicato Topa no ta nada contento cu e protocol cu gobierno kier laga firma den dialogo social pa loke ta introduccion di un impuesto estilo bbo di 1 por ciento pa cuido medico cu ta wordo cubri pa AZV. Lino Hernandez, hurista di e sindicato di trahador di gobierno. A duna esaki di conoce ayera durante un conferencia di prensa. Tambe pa loke ta ponencia di minister di Finanzas Angel Bermudez cu mester kita mita di ambtenaarnan cu ta trahando awo.

Hernandez ta comenta cu e

1 por ciento di bbo riba cuido cu lo bay wordo introduci desde 1 di september 2015 lo bay parcialmente na aumento di salario di dokternan di cas y specialistanan. Topa no ta di acuerdo cu esaki y ta haya cu mester atende cu e situacion den e fondo mes prome cu pidi mas placa for di pueblo.

“Nos tin cu bay wak e estructura di AZV riba su mes. Esey ta prome paso cu gobierno tin cu tuma, hunto cu e uitvoeringsorgaan mes. Despues bo ta bay wak con bo por drech’e na e miho forma posibel, paso awo cada bes tin tekort pa loke ta parti financiero.” Hernandez ta señala riba dje cu den propio ley di AZV tin



para cu si tin falta di likides den fondo di AZV, gobierno via minister di Finanzas ta esun responsabel pa cay aden y suplementa e fondo. Cu e

bbo culmulative cu tin planea, AZV lo bay haya mas placa cu si nan hisa e premie cu 1 por ciento, segun Hernandez. Topa ta apela na e participantenan na dialogo social pa lesa e protocol un par di biaha mas y reconsidera su contenido prome cu firma.

‘Con un dienst ta bay draai?’

Hernandez tambe tabata hopi critico riba ponencia di minister Bermudez cu mester manda alrededor di 50 por ciento e di trahadonan di gobierno cas. Segun e sindicalista, a pesar cu e ta keda bisa cu e vakminister y no tin niun punto di salida politico,

Bermudez ta keda expresa su mes politicamente cada biaha. E minister awo kier manda mita di ambtenarij cas.

Segun Hernandez, despues cu a manda cantidad di contratista cas, awo por ehempel departamento di impuesto Siad a haya su mes confronta cu un ‘onderbezetting’. “Awo nan ta poniendo hende haci trabou cu no ta para den nan taakomschrijving”, segun Bermudez. “Con un dienst ta bay draai si bo tin 150 hende anto bo ta kita mita anto keda cu 75 hende? Cu 150 hende mes bo por keda onderbezet. Mi kier pidi minister Bermudez pensa dos bes prome cu haci expresionnan asina.” □